

Ta temporada di Shimarucu

ORANJESTAD – Ken no ta corda nan infancia canando den mondi y piki poco Shimarucu. Hopi ta corda esaki como nan fruta di infancia. Den dado caso mayoria biaha nan ta come berde mes. Imagina bo ora cu e ta ful cora y bon “hecho” nan tabata plunder ful e mata. Sigur antes tabata tin hopi di e matanan di Shimarucu planta den cunucu.

Awendia esaki no ta asina

popular mas. Pa bo por haya un mata di Shimarucu den mondi ta hopi dificil. Varios di nos mondinan aki a wordo destina pa construi vivienda.

Un mata di Shimarucu no ta un mata cu ta crece mucho grandi. Nan ta matanan cu ta keda relativamente cortico y tin biaha nan ta yega te cu 2 pa 3 mester di haltura. Un mata cu ta originalmente for di Yucatan, Mexico. E fruta ta cora manera rondo. Ta contene hopi vitamina C y antioxi-



dante. Tin biaha poco zuur te cu hopi zuur. Despues di yobida e ta un di e matanan cu masha lihe mes ta haya fruta.

Manera semper cu tin matanan di Shimarucu den vecindario y cu nan ta cuminsa floria y duna fruta bo ta cuminsa haya molester di “lembelembe” cu ta hopi fastioso. Tin biaha esaki ta bay te

den auto y bo ta mira nan na e glasnan parti paden.

Cabruto tambe ta gusta come e mata aki. Un mata cu ta wanta hopi segura. Durante di e periodo aki tambe e mata ta keda sin blachi. E ta muestra manera seco y tin ora manera morto, pero na momento cu poco awa yobe mesora e ta cuminda haya flor. Su flor-

nan ta chikito di color ros pa cu tin biaha ta muestra manera color biña.

E fruta mes ta for di comienso berde chikito y segun cu e ta crece e color ta cambia bira cora y cla pa come. Cabruto tambe ta gusta e mata aki hopi pa na para y come.

Na Aruba ainda nan ta traha dushi di Shimarucu. Esaki nan ta wordo traha cu sucu y algun otro ingrediente y e ta keda masha autentico di Aruba.

Recientemente sr. Vicente Kock tambe ta traha biña di Shimarucu di Aruba. Tin biaha e ta combina esaki cu Casho y asina traha e Biña di e dos combinacionnan aki. Algo masha particular cu sr. Vicennte Kock ta produci. Turistanan cu ta bishit’e ta keda masha encanta di saboria un bon Biña traha localmente.

E mata di Shimarucu ta obtenibel aki na Santa Rosa. Si bo ta desea di tin un mata asina den bo hofí pasa busca esun di bo.